

Merkatari erdaldunari euskaraz Zumaian

ZUMAIAKO UDALAK inkesta egin du herriko kontsumitzaileek erosterakoan zein hizkuntzatan aritu nahi duten jakiteko eta gehiengoak euskaraz nahi duela erantzun du. Ondorioz, merkatarientzako kanpaina egin dute. Bi mezu nabarmentzen dira: batetik, merkatariei lehen hitza euskaraz egitea eskatzen zaie, alegia, bezeroari argi uztea euskaraz badaikiela. Bestetik, nahiz eta euskaraz oso gutxi egin edo batere ez, ulertzen baldin badu, bezeroari euskaraz segitzeko aukera ematea aholkatzen die. Gero eta gehiago aipatzen den elebitasun pasiboaren adibideetako bat

da. Merkatariei arraroa egingo zaie bezeroa euskaraz egitera animatzea, beraiek gutxi jakinda, baina euskaraz aritu nahi duen bezeroari ere kostako zaio gaztelaniaz ari zaionari euskaraz egitea. Praktikak esango du.

Tolosar gazteen ahozotasuna aztergai

EUSKO JAURLARITZAK, Gipuzkoako Foru Aldundiak eta Tolosako Udalak babestutako egitasmoa da, Mintzolak gidatuko duena. Lau urteko esperientzia pilotua izango da eta Tolosako hiru ikastetxetako –Hirukide Eskolapioak, Orixe Institutuko DBH eta Laskorain Ikastola– ikasleen euskarazko ahozko jarduna aztertuko dute.

Donibane-Lohizuneko gau eskolak 30 urte

DONIBANE-LOHIZUNEKO gau eskola ofiziala 1980. urtean abiatu zen, nahiz eta 1968az geroztik eskolak ematen aritu ziren. 30 urte egin ditu gau eskolak eta Ipar Euskal Herriko lehena izan zen. Joan den asteburuan, hilak 31, ospatu zuten urteurrena.

Lanerako hiztegia

ELHUYAR eta Lanekiren elkarlanari esker argitaratu da eta jakinbai.com webgunean zintzilikatu dute 5.641 kontzeptu biltzen dituen lan mundurako hiztegia.



Honelako albistek egunero irakurtzeko, jaso hari@DOAN e-postaz: www.argaia.com/harpidetza_haria.php

BAHEA

[Malores Etxeberriak gipuzkoaeuskar.net-en Enric Larreularen *Dolor de Lengua* liburua izan du hizpide. Liburua hizkuntza gutxituetako hiztunek sentitzen dituzten min mota askotarikoez ari da: “Oso gutxi aztertutako gaia dela dio Larreulak, baina ondorio inportanteak dituena sufrimendua nozitzen ari diren pertsonengan. Eta, zer esanik ez gizartean, elkarbizitza zailtzen duelako. Hizkuntzaren etorkizunaz kezkatuta dauden pertsonak disimulatu egiten dutela dio, ez dutela gaiaz hitz egiten edota hitz egiten dutenean, gezurra esaten dutela, batik bat erdal hiztunen aurrean. Gezurra, besteak gehiago direlako, ez dutelako gai honetan haienganako konfiantzarik, barneko emozioak direlako, ez dutelako bizilaguna mindu nahi... Isiltasun hori oso kaltegarria dela eta itxurazko elebitasun egoerak hizkuntza gutxitua sozialki desagertzera darabala gaineratzen du Larreulak.](#)

Hizkuntza sozialki erabilgarria izango bada –sozialki erabilgarria izatea hartzen du hizkuntzaren ‘salbaziotzat’–, gaiaz asko hitz egin behar dela dio, asko, zintzoki eta denok, bateko zein besteko hiztunok”.

TALAIAN

Kapital iheslariei mozorroa kendu

Espainiako Ogasunak “kontuak” eskatu dizkie Suitzan diru beltza duten 3.000 titularrei. Ikerketa hasi dutela diote, eta segurtatu dutenez, soilik Suitzako banku bakarrean, HSBCn, kopuruak 6.000 milioi euro gainditzen ditu. Ogasun horrek susmoa du kasu gehienetan delitu fiskala dagoela. Delitu fiskal gisa kontsideratua izateko beharrezkoa da kontuetan dagoen kapitalak 120.000 euro gainditzea. 3.000 kontu “opako” horietatik, jakina da Gipuzkoa eta Bizkaiko ogasunetara 89 eta 64ren zerrenda iritsi zaiela, hurrenez hurren, bertan tributatzen dutelako. Pentsatzekoa da Euskal Herriko gainerako ogasunetara ere dagokien zerrendak iritsi direla.

Administrazioak nahiko zuhurrak izaten dira horrelako gaietan. Tentazioa izaten dute negoziatzeko: dirua erregularizatu zigorrak kentzearen truke. Nahiz eta bide horretatik ez direla ari dioten, amnistia fiskalaren bidetik alegia, praktikan, hori da Espainiako eta Euskal Herriko ogasunek hartzen duten neurria. Baina politika gogorrago eta intransigenteagoa behar da. Adituek kalkulatzen dute paradisu fiskaletan 6 bilioi dolar (4,6 bilioi euro) daudela. 185.000 milioi euro Espainiako Estatuko fortunei dagokie. Diru horrekin gaur egun jasaten ditugun “doikuntza” arazoetako asko konponduko lirateke. Lakra hau eragotzi nahi bada, izen-abizenekin mozorroa kendu beharko litzaieke kapital iheslariei. Herritarrek ezagutu ditzatela. Seguruena, horien artean topatuko ditugu doikuntza fiskala, lan eta pensio erreformak, BEZaren igoera, IRPFaren moldaketa, osasun zerbitzuak ordaintzea eta abar, defendatzen dituzten asko. Langile, pentsiodun eta langabetuei odola zurrupatzen dienak dira. Lapur lepazuridunak dira.

Juan Mari Arregi